

# Prontadad da discutir è avant maun

Las circumstanzas actualas sforzan la pressa rumantscha dad agir

DAD ANDREAS CADONAU

■ **Las pretensiuns da l'editur da la Somedia Hanspeter Lebrument per l'avegnir da la pressa rumantscha na fruntan betg sin resistenza en la Rumantschia. Ils pertutgads signaliseschan precaut consentiment vers il princip da collavurar ed èn prontos da discutir. La basa da discussiun è avant maun. Tuts fan part dal cussegl da fundaziun da la Agenzia da novitads rumantscha.** Las explicaziuns da l'editur da la Somedia dal venderdi passà pertutgant l'avegnir da las medias rumantschas ed ina pli ferma collavuraziun dad RTR ed anr n'èn betg stadas zuppentadas a *Martina Gammeter*, gestiunaria da la Gammeter Druck und Verlag SA ed editura da la «Posta Ladina». Ella ha ditg da senz'auter pudair suandar las explicaziuns da *Hanspeter Lebrument* che ha crititgà la discrepanza tranter la summa a disposiziun a la

pressa rumantscha visavi als daners a disposiziun als meds electronics rumantschs. Ella ha manegià ch'ina tscherta differenza saja bain giustifigada essend che la produenziun da contribuziuns electronics saja in buntant pli chara.

La differenza momentana saja dentant memia gronda. L'editura da la «Posta Ladina» vesa anc potenzial da sa megliar tar la anr, sco ella ha ditg sin dumonda. Per ella na saja l'organiziun centrala da la anr betg sa cumprovada. Ina dislocaziun en las regiuns fiss a Gammeter pli d'engrà e correspundess, tenor atgnas explicaziuns, als bases da la pressa locala. Plinavant attribuescha Gammeter ad RTR ina lavur professiunala en las regiuns ed uschia che l'editura da la «Posta Ladina» nun è da princip cunter ina collavuraziun pli stretga tranter anr ed RTR. Dad ina collavuraziun ch'era la «Posta Ladina» vul profitar.

## La anr discutescha gia

E tge dian ils directamain pertutgads RTR ed anr. *Martin Gabriel*, president dal cussegl da fundaziun da la anr ed en in per mais nov secretari general da la Lia Rumantscha, ha ditg d'avair prendì enconuschientscha da las explicaziuns da Lebrument. El ha punctuà da s'exprimer en il num dal cussegl da fundaziun da la anr che saja gia londervi da discutir l'avegnir da la anr suentar l'onn 2020. Da resguardar en quel connex saja sa chapescha il fatg che la anr haja anc auters clients sper la Somedia; la «Posta Ladina», la «Pagina da Surmeir» e sa chapescha era Radio e Televisiun Rumantscha. «Nossa intenziun è da purtar ina soluziun che corresponda a tut nos clients.» Gabriel ha explitgà ch'il cussegl da fundaziun da la anr vegnia a discutir la proposta da Lebrument e las pusseivladads che sa porschian dad integrar quellas cun las ideas da la anr. «Collavurar nua che

quai fa senn e trair a niz sinergias», è la devisa da la directura dad RTR, *Ladina Heimgartner*. Concret veglia quai dir che RTR saja stà e saja vinavant avert per discutir cun partenaris davart models da collavuraziun ed haja era signalisà quai. Dal reminent valia quai per tuttas unitads d'interpresa da la SRG SSR. S'exprimida è la directura era davart l'idea per ina gasetta rumantscha gratuita. Sche quella chattass insumma l'accoglientscha dal public fiss anc da retschertgar en detagl, ha ella fatg a savair e fatg attent a sias prioritads. «Il pli impurtant per mai è ch'ils meds da massa rumantschs sajan da buna qualitat, ch'els porschian ina tscherta diversitad d'opiniuns e ch'els cuntanschian oz ed en l'avegnir tut las gruppas en mira, era las gruppas giuvnas.» Plinavant ha Heimgartner visà a la cunvegna da collavuraziun che lubechia a LQ da duvrar texts che RTR publicgeschia sin sia pagina d'internet.

Che RTR produceschia texts exclusivamain per in product da print ubain edeschia sez ina gasetta na saja betg previs en la concessiun che definescha l'incumbensa da la SRG SSR.

## Las finanzas èn er in tema tar la URS

Preschent il venderdi passà a Cuira è era sta il president da la Uniun Rumantscha da Surmeir *Gion Sonder*. L'uniun ch'edescha la «Pagina da Surmeir». El ha explitgà dad avoir surpiglià da nov l'incumbensa al timun da la Uniun Rumantscha da Surmeir, memia baud per pudair s'exprimer detagliadamain. Sonder vul l'emprim discutir en suprastanza. Da princip beneventia el tuttas stentas da rinforzar la pressa ed ils meds da massa rumantschs. Era l'Uniun Rumantscha da Surmeir e sia ediziun sajan confruntadas cun sfidas finanzialas, ha explitgà Sonder.



La directura dad RTR Ladina Heimgartner ed il president da la anr Martin Gabriel èn prontos da discutir ina collavuraziun pli intensiva.